

tenditur. Orientale latus claudunt montes Gumaræ, Zaronii, & radices montis Zalagæ: à Meridie vero fluvio Bunaza terminatur. Fuerunt hic olim oppida & arces quam plurimæ, sed bellorum injuria major pars periit. Oppida præcipua sunt, *Larissa* & *Casar Elcabir*, hoc est, regum palatium. A Mamora secundum oram, quatuor leucarum itinere pervenitur *Salam*, vulgo *Salé*, ad fluvium Rebata. Urbs est antiqua, ab *Abdelrezzas*, filio regis Fessani & Maroccani restituta. Possidetur hodie ab Andalusinis illis Mauris, quos rex Hispaniæ superioribus annis misit in exilium: qui hinc etiam si comiter excepti Rempublicam moliantur, regem tantum obiter agnoscentes. Struxerunt enim hinc prætorium sive Divanum, Senatus sedem, qui constat ex Marabouto summo ipsorum pontifice, Moula ejusdem Vicario, Ammirallo, arcis præfecto, sacerdote sive Chefro, & civibus opulentioribus. Hi urbem ita muniverunt, ut Maroccano difficile sit eos ad officium cogere. Portas est securissimas, licet ingressus multis scopulis & vadis sit impeditus, & gravibus tempestatibus obnoxius: defenditur à turri à Mauris exstructa, quam *Felcacre* vocant. Paulum extra urbem ad oram castellum est munitissimum, ubi Marabout moratur. In urbe conspiciuntur rudera palatii, ut apparet à columnis marmoreis quæ eruantur sumtuosissimi. Ad alterum urbis latus visitur *Caresane* arx, & turris *Ladaban*, quæ tenetur ab Arabibus, qui Regi fideles, Salensibus sunt infensiores. Frustra tentaverat Rex superioribus annis urbem per Arabes Rabatenses recuperare.

*Elabat.*

*Habat*, seu *Elabat* regio clauditur à Septentrione mari Mediterraneo, ab Occasu Algaræ paludibus, à Meridie Suarga fluvio: ab Ortum vero montibus Herculeo freto vicinis. Urbes in ea præstantiores, sunt *Arzilla* seu *Azella*, ampla satis, atque à freto Herculeo 70 mill. distans. *Tingis*

seu *Tanger* ampla & antiqua ad Oceani littus posita, & à freto Herculeo 30 mill. distans. *Septa* seu *Senta*, maxima civitas, ad fauces freti ejusdem, quæ quidem tres civitates Regi Portugalliæ parent.

*Errisa* regio incipit. non procul ab Herculeo freto, & ad fluvium usque *Nocor*, seu *Hoccore* ad ortum protenditur.

*Garetti* regio initium sumit ab Occasu à Medulo flumine, & ad fluvium *Mulviam* terminatur ad ortum, à Meridie montes ipsam à desertis Numidiæ separant, à Septentrione ad mare Mediterraneum protenditur. Duas hujus urbes præcipuas Hispani occuparunt.

*Chaus* ultima Fessani regni regio tertiam fere ipsius partem exhaurit, in longitudinem patens 130 mill. nempe à fluvio *Zha* ad Ortum, ad fluvium *Gurguigara* ad Occasum: in latitudinem vero mill. 170. Nam omnis ea pars, quæ Mauritaniam spectat, hujus regionis latitudinem constituit. Oppida præcipua sunt, *Dubdu* & *Teza*, maxima & opulentissima, civiumque frequentia nobilia.

Ommirabih fluvius maximus, Ptolemæo *Cus* sa, ex Atlante inter altissimos, qua *Tedles* provincia Fessano Regno confinis est, scaturiens, per planitiem primum fluit, in angustas deinde valles coarctatus, pontem elegantissimæ structuræ alluit: hinc meridiem versus planities irrigat, quæ regionibus *Ducalæ* ac *Temesnæ* interjacent, donec ad *Azamuri* mœnia in Oceanum se exoneret. Hyberno ac verno tempore transvadari non potest, verum merces ac viatores quibusdam, ceu rastris, utribus ad utramque ripam superimpositis, trajiciuntur. Sub finem *Maji*, magnam piscium copiam, Itali *Iaschas* vocant, in eo piscantur, quibus salitis plurimæ onerantur naves, quæ eosdem per *Lulitaniam* aliaque loca distribuunt.

*Errisa.*

*Garetti.*

*Chaus.*

*Ommirabih fl.*

